

Adem, a.s.


U početku je bio samo Bog, Allah, i ničeg drugog nije bilo.

Allah je jedini Koji postoji oduvijek, Koji nema početka, ali ni kraja. On nije stvoren, a sve drugo je stvorio. On sve može, sve zna, sve čuje i sve vidi. Ništa se ne može dogoditi mimo Njegove volje i znanja. Ničemu nije sličan, niti se išta može uporediti sa Njim. On je jedini Bog i stvoritelj je svega postojećeg, vidljivog i nevidljivog.



Svijet koji vidimo ima svoj početak, kao što će imati i svoj kraj. Mi ne znamo kada je Allah započeo sa stvaranjem svijeta, a ne znamo ni koliko je svijet star, niti koliko će još dugo trajati. Allah kaže da je nebesa i Zemlju stvorio za šest dana, a nije nam poznato koliko je bilo trajanje tih dana.

Stvaranje na Zemlji odvijalo se u "sedam dana". Prema Poslanikovim riječima, Allah je prvo stvorio samu Zemlju, zatim po njoj postavio planine i stvorio biljke, potom je stvorio zlo i ono što je ružno, zatim svjetlost, životinje i, na kraju, čovjeka.



Prije nego što je stvorio čovjeka, Allah je melekima kazao da će na Zemlji postaviti namjesnika.

– Zar ćeš postaviti nekoga ko će po njoj nered činiti i krv prolivati, a mi Te veličamo i hvalimo onako kako Tebi dolikuje? – rekli su oni.

Meleki nisu mogli dokučiti Allahovu zamisao, jer oni, kao i sva druga stvorenja, mogu imati onoliko znanja koliko Allah hoće da ga imaju.

Prvi čovjek bio je Adem. Njega je Allah stvorio od elemenata zemlje i udahnuo mu dušu. Potom ga je podučio nazivima svih stvari i rekao melekima:

– Kažite mi vi njihove nazive!


– Uzvišen neka si Ti! – uzviknuli su oni i dodali:


– Mi znamo samo ono čemu si nas Ti podučio!

– Reci ti nazive ovih stvari! – obratio se Allah Ademu.

I, kada im je Adem kazao nazive stvari, meleki su bili iznenađeni. Tek tada su shvatili da to novo stvorenje ima prednost nad njima, jer mu je Allah dao nešto što oni nemaju.

Tako je Adem, zahvaljujući znanju koje je imao, stekao prednost nad melekima. Allah je melekima i džinima naredio da izraze poštovanje prema tom novom biću i da mu se poklone. Meleki su to odmah učinili, jer su oni pokorni svome Gospodaru i uvijek izvršavaju Njegove zapovijedi.





Jedan od džina, koji je bio vrlo učen i zbog toga bio u društvu meleka, osjetio je zavist prema Adamu. Kada se trebao pokloniti pred tim novim, neobičnim bićem, odbio je to učiniti.

– Zašto se i ti nisi poklonio pred Ademom? – upitao ga je Allah.

– Ja sam bolji od Adema! Mene si stvorio od vatre, a njega od zemlje! – rekao je.

– Onda, izlazi odavde! – rekao mu je Allah i prokleo ga.

– Gospodaru, dopusti mi da ostanem ovdje do Sudnjega dana! Kunem se Tvojom veličinom da ću Ademove potomke sve u zabludu odvesti, izuzev onih koji Te iskreno budu obožavali i dobra djela činili! – zamolio je on.

– Dopuštam ti – rekao je Allah – ali ti se kunem Svojom veličinom da ću tobom i onima koji se za tobom povedu napuniti Džehennem!

Od tog trenutka je taj džin, Iblis, postao najveći čovjekov neprijatelj.



Adem se osjećao usamljenim pa mu je Allah stvorio ženu i rekao:

– Ademe, eto, ti i tvoja žena živite u Džennetu. Jediti u njemu koliko god hoćete i šta god hoćete, samo se ovom drvetu nemojte približavati, jer biste tako sebi nasilje učinili!

Adem i Hava su, tako, imali šta su htjeli i hodali kuda su htjeli. Nizašta se nisu morali brinuti, nizašta ulagati trud. Trebali su se samo držati onoga što im je rekao njihov Gospodar.

Iblis nije mogao podnijeti da oni budu u takvom rahatluk, obasuti tolikom Allahovom pažnjom, jer je u sebi nosio veliko neprijateljstvo i zavist.

- Zna li zašto vam je Allah zabranio da jedete sa ovog drveta?! – rekao im je Iblis, praveći se da im je prijatelj. – Zato da ne biste postali meleki ili besmrtni! I oni se povedoše za njim. Ali, čim okusiše plod sa zabranjenog drveta, otkriše im se stidna mjesta, koja oni stadoše pokrivati dženetskim lišćem. I onda začuše riječi svoga Gospodara:

- Zar vam to drvo nisam zabranio?! Zar vam nisam rekao da vam je šejtan otvoreni neprijatelj?!

Tada su oni shvatili šta su uradili, pa se pokajaše i rekoše:

- Sami smo sebi krivi, Gospodaru. Ako nam ne oprostiš i ne smiluješ nam se, mi ćemo biti izgubljeni!





Nakon što im je pokazano kako se trebaju odnositi prema Božijim uputama i otkriveno im ko im je najveći neprijatelj te pokazano kako da postupe kada on njih i njihove potomke bude navodio na neposlušnost Bogu, rečeno im je:

– Izlazite odavde! Od Mene će vam dolaziti uputa! Onaj ko bude slijedio Moju uputu, neće zalutati i neće biti nesretan. A oni koji ne budu vjerovali i upute moje budu poricali, u Džehennem će otići. I u njemu će vječno ostati!

Tako su se Adem i Hava, kao prvi muškarac i žena, našli na Zemlji. Od njih će nastajati potomstvo milijardi ljudi, koji će se na sve strane razmiliti i u različite narode izroditi.

